

玉函山房目耕帖

目耕帖卷二十九

歷城馬國翰竹吾甫

禮七

校人掌王馬之政注政謂差擇養乘之數也月令班
馬政陳深訓雋牧養之法有養之於官有藏之於
民所謂藏之於民如邱甸歲取馬四匹之類不仰
國家芻秣如有事田獵征伐臨時徵召然而在天
子之都諸侯之國大夫之家未嘗不自畜馬此是
養之於官者漢家所謂二十六苑亦是官司所養

之馬如衛青霍去病之徒伐匈奴有所謂官馬有
所謂私馬則其制尙存隋唐之間治兵之制天子
閑廐監牧非不盛然府兵未嘗給馬初不過給之
以錢使府兵自買若是不足衆人共出錢買馬以
此知尙有古人遺法後來兵法漸壞府兵貧不能
買馬然後以監牧之馬給之乃是制度之壞如此
凡頒良馬而養乘之乘馬一師四圉三乘爲阜阜一
趣馬三阜爲繫繫一馭夫六繫爲廐廐一僕夫六
廐成校校有左右騶馬三良馬之數麗馬一圉八

圉爲師八師一趣馬八趣馬一馭夫注校有左右
則良馬一種者四百三十二匹五種合二千一百
六十匹駑馬三之則爲千二百九十六匹五良一
駑凡三千四百五十六匹然後王馬大備麗耦也
駑馬自圉至馭夫凡馬千二十四匹與三良馬之
數不相應八皆宜爲六之誤也師十二匹趣馬七
十二匹則馭夫四百三十二匹然後從而三之爲
千二百九十六既三之無僕夫者不駕五路卑之
也賈疏依經八計之得千二十四匹其三良馬則

當千二百九十六匹故言不相當若作六計得千二百九十六匹與三良馬數合又云不見駕之馭夫或脫也王應電翼傳舊說謂駕馬二千二百九十六匹是駕馬爲良馬三之一非三良馬之數矣八麗十六匹一圉師教之八師一百二十八匹也一趣馬篤之八趣馬一千二十四匹也一馭夫領之止於馭夫而不屬於僕夫者以駕馬止充雜用而不當王之五路也凡七馭夫爲馬七千一百六十八匹則與三良馬之數略相當矣王安石新義

駑一物而必三良馬之數者以馬材之不良者充役事爲多故也

天子之馬十有二閑馬六種邦國六閑馬四種家四閑馬二種賈疏引趙商問以司馬灋論之甸方八里有戎馬四匹長轂一乘合大夫采地四甸一甸共王其餘三甸纔有馬十二匹就校人之職相較甚異答曰司馬灋甸有戎馬四匹長轂一乘此爲民出軍賦無與於天子國馬之數林之奇全解周禮以天子十有二閑先儒論數不過三千餘匹衛

文公承夷狄殘滅新造之國末年亦至駉牝三千
若以制度論之衛以諸侯之國又當殘亂之餘安
得遽如成周全盛乘馬之數蓋所謂天子十有二
閑是養之於官者衛文公之駉牝三千舉官民通
數而言之此成周官民通牧之制也

凡馬特居四之一注欲其乘之性相似也物同氣則
心一鄭司農云四之一者三牝一牡賈疏三牝各
一通牡爲四共駕一車取同氣一心之義王安石
新義三牝一牡欲其生之衆也恭讀

欽定周官義疏陳氏注謂牝牡雜則不可以駕此謂養馬
時不知馬共槽棧亦蹄齧不可養惟注三牝一牡
欲其乘之一性相似爲近然果爾則經文當曰凡
馬乘匹牡居之一其義乃著以近代之法證之凡
牡駒之扇九而存一以爲特以非扇雖人騎亦難
控制也况欲服之驂之而齊其任乎先王愛物之
政則扇三而存一對扇而言故不曰牡而曰特也
所存之特旣少則通淫時以一特將三牝義亦可
該矣

春祭馬祖執駒注馬祖天駟也孝經說曰房爲龍馬
王應電翼傳天文閣道下王良前四星名曰天駟
馬稟其氣以生春氣發故祭之以祈蕃息舊說以
房爲天駟主天子之後寢於五月初昏正當午位
而乾爲馬得午位盛陽之氣適當房之次故傳會
而爲此說恭讀

欽定周官義疏房固主後宮而一星不必止主一事伶州
鳩曰武王克殷月在天駟日在析木之津辰在斗
柄此天駟指房宿未可以爲非也

夏祭先牧頒馬攻特注夏通淫之後攻其特爲其蹄
齧不可乘用鄭司農云攻特謂驟之王安石新義
攻特謂駒之不可習者庾人攻之矣及成焉而不
可習則校人攻之郝敬完解攻特牝馬方孕攻去
其特勿使近牝案夏小正執陟攻車傳攻車也者
教之服車數舍之也此介甫之所本月令仲夏之
月游牝別羣注孕妊之欲止也此仲興之所本然
皆與執駒文複經以攻加特則先鄭之說不可易
矣

等馭夫之祿宮中之稍食注宮中師圉府史以下也
王氏新義宮中之稍食則馬有養乘於內者故也
恭讀

欽定周官義疏宮當作官字之誤也他職有府史此更有
師圉之屬以官中該之與秋官士師掌官中之政
令同義據注義亦當作官蓋漢時所誤

趣馬掌贊正良馬而齊其飲食簡其六節注差擇玉
馬以爲六等賈疏六等卽上種戎齊道田駕六種
是也王應電翼傳良馬以駕五路也趣馬所掌止

於三乘知之爲詳故掌贊校人而正其等不使之
間雜不齊也六節謂行止進退馳驟之節舊說以
爲種戎道齊田駕此乃六物豈得爲六節且此專
指贊正良馬安得以駕馬雜之此駁正賈疏極當
說六節亦頗近理劉彝中義目以知其瞻之不驚
口以知其性之不悖耳以知其力之不殫鬣以知
其血之有餘毛以知其氣之不暴蹄以知其行之
不跲六者簡馬之大節也劉說不知何據似從古
相馬法中括而言之

巫馬掌養疾馬而乘治之相醫而藥攻馬疾受財於校人賈疏巫知馬崇醫知馬疾疾則以藥治之崇則辨而祈之二者相須故巫助醫也案天官有獸醫夏官復設巫馬四人醫四人重馬政也

國之大事在祀與戎牛爲牲故地官有牧人主養牛馬共乘故夏官有牧師主養馬國憲家猷秣馬之法必視其齒歷勞逸而調息之養馬之要盡於此數語

庾人掌十有二閑之政教以阜馬佚特教駢攻駒注

杜子春云佚當爲逸案佚逸古今字孟子四支之於安佚也正作佚字無煩改也

及祭馬祖祭閑之先牧及執駒散馬耳圉馬鄭司農云散謂聒馬耳毋令善驚也後鄭云閑之先牧先牧制閑者散馬耳以竹括押其耳頭動搖則括中物後遂申習不復驚鄭鏐解義庾人職卑不宜主馬祖之祭蓋於校人祭馬祖之時則祭閑之先牧於校人命執駒之時則散馬耳圉馬曰及者及此時則舉此事爾又云散者以其疎散而不知畏故

聒其耳圉猶禁圉之圉蓋禁而制之使不得以近
母

正校人員選注校人謂師圉也正員選者選擇可備
員者平之郝敬完解校人總馬政擇馬全善者備
五路之用也鄭謂校人爲師圉恐非王應電翼傳
馭夫以下備員於校人而中其選者庾人差而正
之案二說皆與注異困學紀聞汧渭之間未嘗無
牧而非子獨能蕃息於周汧隴之間未嘗無牧而
張萬歲獨能蕃息於唐此得人之效也語極精渾

馬八尺以上爲龍七尺以上爲駮六尺以上爲馬注
小大異名爾雅駮牝驪牡元駒裏驂鄭司農云月
令駕蒼龍陸佃埤雅釋馬周官馬八尺以上爲龍
戎馬之高蓋亦準此故爾雅曰馬八尺爲駮也駮
卽戎馬故其字指事而戎事齊力尙強故爾雅又
曰絕有力駮也校人云種馬一物戎馬一物戎馬
卽駮馬是也種馬卽龍是也史言良馬謂之龍種
蓋出於此又云詩曰駮牝三千三千已多駮牝取
其大也蓋驂馬常小今俗謂之小馬以此宗廟用

龍戎事用駮田事用駮駮田馬也考工記曰國馬之輅深四尺有七寸田馬之輅深四尺鄭云國馬高八尺衡高八尺有七寸除馬之高則餘七寸爲衡頸之間也田馬高七尺衡高七尺有七寸除馬之高爲衡頸之間也

圉師掌教圉人養馬春除蓐覺廐始收夏庌馬冬獻馬注蓐馬茲也馬旣出而除之新覺焉神之也春秋傳曰凡馬日中而出日中而入故書庌爲訝鄭司農云當爲庌元謂庌廐也廐所以庇馬涼也劉